

四明叢書

張宗祥



序

王牖軒先生手稿存於屠康侯所者凡四種一曰儒林宗派爲萬季野著十六卷本蓋依辨志堂舊鈔增註其籍貫別號諡法而釐正之者也非於萬書外有所增益二曰全吉士七校水經注四十卷蓋與陳詠橘重理殘本更得校語四十條是也三曰宋元學案補遺一百卷初稿爲四十卷附錄二卷嗣改定爲一百卷其次第悉依黃全宋元學案之舊外附宋儒博考二卷元儒博考一卷原稿幾經改竄皆先生手定者也四曰世本集覽

其原起提綱條例目錄通論有清本而所謂集覽八冊  
者後改定爲六冊分卷仍四十有八又先生手輯而待  
整理者也壽鏞既見此四書先爲其易因刻增註之儒  
林宗派十六卷次及宋元學案補遺一百卷積三載之  
歲月合四五同志之精力經三四番之讎校今已將藏  
事矣獨世本集覽一書望洋興歎初與康侯謀擬用攝  
影法將稿影出再圖整理康侯遽之倩商務印書館估  
價會值國難發於滬上幾遭火厄事不果行忽忽四年  
輒引爲憾壽鏞於鄉先輩著述斷編殘簡視若其球乃

鉅製煌煌姓氏之原卽生民之始有關史學源流者反  
忽焉而任其緒之墜豈人情哉且世本卽系本見於史  
記索隱集解者已無全書而先生自年十六以至四十  
盡力以期其成者宏目大綱粲焉具備後生小子但事  
整治便可成書敢不勉負仔肩然其難則更甚於學案  
補遺逡巡其閒懼其無終者以此也去歲先刻原起提  
綱條例目錄通論五卷今年元旦馳書康侯仍索其稿  
思償吾願焉顧猶未著手耳先生原起所謂他年成功  
有日庶副知己之望者未知壽鏞能副先生之望否耶

今將已刻者播之於世俾見大凡更望邦人君子匡其  
不逮而促之成焉若夫全氏七校水經注光緒戊子已  
梓行獨不及水道表是表爲先生輯其子龍光校亦宜  
刊也民國二十五年四月後學張壽鏞序

先師王子行狀

先師王子諱楚材初名梓楚材其字更名梓材後竟以字行學者稱贍軒先生世居鄞西柳莊坊高祖炳國學生工詩善書歷游大僚幕府著有定海鹽政議咄咄吟曾祖畿祖鏐父謨三世皆名諸生先生稟承家學復徧謁里中名師肆力治經融會漢宋諸儒之說而獨衷一是尤究心六書及音韻之學嘗謂古人以此爲小學童而習之今則訛謬不勝指數又謂書法盛於晉唐亦壞於晉唐蓋專講結構任意增損而六書之法寢失惟顏

魯公尙有典型耳聞者駭之旣補郡博士弟子員餽於  
庠無錫汪寫園先生士侃同縣童萼君先生槐先後掌  
教月湖書院皆許爲學有根柢學使道州何文安公按  
試稱其研覃傳註且終卷無俗字特置高等江右陳碩  
士侍郎繼任復甄拔之充道光十四年優貢明年考取  
八旗教習期滿出宰廣東三十年九月署樂會縣事纔  
數月以疾卒於官咸豐元年正月十四日也年六十先  
生勤於著述其裒然巨帙最爲精力所著者凡四種一  
曰重校宋元學案百卷昔黃梨洲先生明儒學案刻於

慈谿鄭氏其宋元學案未及成編季子耒木及吾鄉全  
謝山皆嘗補輯何陳兩學使屢訪此書後得黃氏耒木  
補本而全氏弟子盧學博鎬之後人亦出謝山遺書先  
生與慈谿馮孝廉雲濠合校補訂以付剞劂文安公序  
之板燬於西夷兵燹先生攜書入都復與文安伯子紹  
基重校刊於都中先生別成宋元學案補遺百卷馮氏  
何氏各存其副本一曰彙錄全校水經四十卷謝山先  
生以水經舊本經註混淆屢經考訂晚主端溪講席猶  
朝夕披覽蓋已七校而未成完書先生得其遺藁重加

釐正闕佚者取趙東潛本引全氏語兼採鮎埼亭集以補之其副本一寄山右張石舟穆屬其覆校刻入楊氏叢書一存慈谿馮氏又依酈註作水道表如原書卷數由是讀水經者瞭如指掌一曰世本集覽上自皇古下逮戰國遇未見書足資考證者靡不薈萃其中露鈔雪纂歷三十餘年不懈一曰王氏宗譜備考八卷瑯琊太原各分支派先生廣搜博採元元本本脈絡分明雖譜學專家無以過之其於諸經各有箋釋彙爲解經錄惟易有專書曰周易解詁他書數種曰夏小正輯註曰說

文引經錄曰補輯韻表曰校註高郵王氏詩補韻曰增  
補萬季野儒林宗派曰補輯沈定川文集曰句甬紺珠  
錄皆精核可傳所著古文四卷曰樸學齋文鈔古今體  
詩一卷曰北遊賸語並藏於家先生世承儒業家風孝  
友白華潔養修脯之外不名他錢有弟二人季早卒與  
仲弟式好無閒先生赴官使掌會計及先生卒挈其眷  
屬扶匱歸葬某鄉之原先生生於乾隆五十七年十月  
十六日卒於咸豐元年正月十四日配水氏子二長熙  
原名龍光克衍家學以經解見錄兩補僧生次羃原名

爲光前卒女二長適陳懋煒次適廣東候補道屠繼烈  
孫二潤培恩培先生教授鄉里循循善誘先品行而後  
材藝先經術而後詞章勤於先生之學未窺藩籬何論  
堂奧第念先生汲古研精殫心著述儒宗經學並得薪  
傳自道範云遙長子又復不祿有孫孤弱恐日久無知  
先生者會縣有修志之舉用敢粗陳梗概伏望秉筆諸  
君子垂採焉至居官莅政以受任日淺無所表見且先  
生之足傳者不在一官諸君子當共諒之受業陳勸謹  
狀

壽鏞案鄞志傳本此狀不再錄 又案先生遺藁壽  
鏞所見者四種一爲宋元學案補遺先成於道光戊  
戌者爲四十二卷續於原稿中附益始己亥春終庚  
子冬者乃釐爲一百卷別附宋元儒博攷三卷二爲  
世本集覽其緣起作於道光辛卯同時編目錄分八  
冊今存藁爲六冊四十八卷自題書籤並分題  
禮樂射御書數三爲  
全謝山七校水經注十二冊先生取謝山遺藁重加  
釐正更補水道表所謂王氏重錄本也四爲校訂萬  
氏儒林宗派十六卷先生依辨志堂本重爲釐訂刪

其重複而增註籍貫別號諡法非於萬書外有所增

益也

陳氏行狀謂增補蓋未見原書鄭志因此而誤

四爲雜纂一冊採取經

書粹語分類誌之取於易者爲多昔歲先生之孫名

恩培者交屠康侯收儲壽鏞已將儒林宗派十六卷

宋元學案一百卷別附三卷次第付梓惟世本集覽

六冊其兩冊恩培交康侯時已有鼠嚙矣全書浩繁

排整頗不易易四顧躊躇尙無善策假我歲月當完

成之丙子春後學張壽鏞識

世本集覽原起

梓材自七歲就傳讀小學諸書略識古人名而未知其  
姓氏之由十歲始從先君子夢僧公于張鄮溪司馬家  
授讀尙書及毛詩序知有唐虞三代以及周之有東西  
亦知有十五國之分而猶未知帝王之終始與列國之  
存滅十二歲時見架上春秋傳知其爲紀事之書而古  
人之名多雜載其中時竊而觀之先君子卽以左傳授  
讀焉及十四歲受學于家塾先君子爲及門諸子講論  
司馬遷史記梓材亦與聞焉因知帝王列國之源流且

見史記索隱集解多引系本時與史記相出入意欲見系本之全未始知系本之卽世本亦未知世本之已無全書也次歲從先君子于董小韭明府家得顧復初春秋大事表見其表姓氏者有之表世系者有之以爲獲所未見心益喜爰合而錄之又次歲從先君子于古香眉閣華氏館見同學案上鄭氏通志中有氏族略條分縷析多有裨于所錄而韋注國語鮑注國策亦于是年見之及冬季散館因合尙書毛詩春秋傳國語國策史記分列古人之姓氏各詳其系而世本之見于傳注者

亦條載其中先君子見而心許之然年已十六先君子督以舉業世譜之學雖草創有緒而未遑專及有所得焉則竊載之不敢與先君子得見焉而舉業之不工亦職是之故十八歲二十一歲就試並備卷不售先君子益以舉業督課之而梓材亦自以不能掇芹爲媿自是以後始出訓蒙先君子于舉業外兼課以試經之藝而亦未有得焉至二十七歲始入郡學二十九歲先君子見背梓材讀禮之暇因輯舊錄比年館張司馬家教司馬諸孫見其家有羅氏路史及馬氏繹史李氏尚史時

與司馬長君芝雲明經上下議論明經固先君子所深契者嘗勉以世譜之學必不可置繹史尙史諸書專爲梓材購之又姑夫秦孝廉笑人先生示以陳氏竹書紀年集證采錄甚多及其秉鐸湯溪復示以崔氏考信錄是書考證多確亦節而錄之因名舊錄爲世本集覽分卷四十有八以世本爲名者蓋世譜之學以世本爲宗而世本之全卒不可見且世本多爲史記所本亦未見其盡當因其名而不欲復其舊觀古人之書固無事強輯爲也孟子曰誦其詩讀其書不知其人可乎是以論